



SLUŽBA ZA REVIZIJU FINANSIJSKOG POSLOVANJA

Na osnovu člana 14. stav 1. Zakona o finansiranju političkih stranaka («Službeni glasnik BiH» broj 22/00) i člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2006. GODINU BOSANSKO PODRINJSKE NARODNE STRANKE

Broj: 09-07-6-1172/07
Sarajevo, 03. april 2008. godine

SADRŽAJ:

	MIŠLJENJE REVIZORA	3
4	1. UVOD	
	2. PREDSTAVLJANJE POLITIČKE STRANKE	4
	3. OPIS PREGLEDA I KANCELARIJSKE REVIZIJE	4
	Predmet kancelarijske revizije	4
	Cilj kancelarijske revizije.....	5
	Obim kancelarijske revizije	5
5	4. PRETHODNE REVIZIJE.....	
	5. NALAZI KANCELARIJSKE REVIZIJE I PREPORUKE	5
	5.1. NALAZI	5
	5.2. PREPORUKE.....	5

Služba za reviziju finansijskog poslovanja u Centralnoj izbornoj komisiji Bosne i Hercegovine izvršila je pregled i kancelarijsku reviziju finansijskih izvještaja **Bosansko Podrinjske narodne stranke** i to: godišnjeg finansijskog izvještaja za 2006. godinu i finansijskog izvještaja za period od dana podnošenja prijave za ovjeru za izbore do dana ovjere rezultata opštih izbora, održanih u oktobru 2006. godine.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i članom 15.10 Izbornog zakona BiH i uspostavljanje efikasnog sistema internih kontrola.

Pregled i kancelarijsku reviziju smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled i kancelarijska revizija su ograničeni na kontrolu godišnjeg i postizbornog finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom terenskom revizijom.

Na osnovu našeg pregleda utvrđeno je sljedeće:

- 1. Bosansko Podrinjska narodna stranka je prekršila odredbe člana 4. stav 2. i člana 6. Zakona o finansiranju političkih stranaka, jer kao prilog stranci nije prijavila korištenje poslovnih prostorija bez naknade.**
- 2. Stranka nije ispoštovala odredbe člana 11. stav 3. Zakona o finansiranju političkih stranaka jer finansijski izvještaj nije popunila u skladu sa Pravilnikom o godišnjim finansijskim izvještajima političkih stranaka**

Na osnovu našeg pregleda, odnosno kancelarijske revizije finansijskog izvještaja, osim gornjih napomena pod 1. i 2. nismo zapazili ništa značajno što bi ukazalo na druge nedostatke u izvještaju ili finansiranju ove političke stranke.

1. UVOD

Služba za reviziju finansijskog poslovanja u Centralnoj izbornoj komisiji BiH (u daljem tekstu: Služba za reviziju) je izvršila pregled i kancelarijsku reviziju finansijskih izvještaja Bosansko Podrinjske narodne stranke i to: godišnjeg finansijskog izvještaja za 2006. godinu i finansijskog izvještaja za period od dana podnošenja prijave za ovjeru za izbore do dana ovjere rezultata opštih izbora, održanih u oktobru 2006. godine.

Pregled, kontrola i kancelarijska revizija je provedena u skladu sa članom 25. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i članom 2. Pravilnika o administrativnim procedurama pregleda i kontrole finansijskih izvještaja, broj: 01-07-1267/05, od 05.05.2005. godine.

Zbog činjenice da nije obavljena terenska revizija, postoji velika mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Bosansko Podrinjska narodna stranke je iskazala prihode u iznosu od 9.350,95 KM, čija struktura je data u sljedećoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	0	
2	Prilozi fizičkih lica	1.100	1176%
3	Prilozi pravnih lica	7.171	7669%
4	Prihodi od imovine	0	
5	Prihodi od pr.lica	0	
6	Prihodi od poklona	0	
7	Prihodi iz budžeta	1.080	1155%
	Ukupni prihodi:	9.351	10000%

U godišnjem finansijskom izvještaju politička Bosansko Podrinjska narodna stranka je iskazala ukupne rashode u iznosu 9.323,20 KM.

2. PREDSTAVLJANJE POLITIČKE STRANKE

Naziv političke stranke: Bosansko Podrinjska narodna stranka. Skraćeni naziv stranke je BPNS. Politička stranka je registrovana 14.05.2002. godine kod Kantonalnog suda u Sarajevu pod brojem R-I-7/02.

Sjedište političke stranke je u Sarajevu, ulica Adema Buće bb.

Za zastupanje stranke u 2006. godini bio je ovlašten Seid Karić, predsjednik stranke. Osoba ovlaštena za podnošenje finansijskih izvještaja za 2006. godinu je Javorka Rejc.

U godišnjem finansijskom izvještaju BPNS za 2006. godinu je navedeno da politička stranka nema organizacionih dijelova nižeg nivoa

3. OPIS PREGLEDA I KANCELARIJSKE REVIZIJE

Predmet kancelarijske revizije je godišnji finansijski izvještaj Bosansko Podrinjske narodne stranke za 2006. godinu i finansijski izvještaj za period od dana podnošenja prijave za ovjeru za izbore do dana ovjere rezultata opštih izbora održanih u oktobru 2006. godine.

Cilj kancelarijske revizije je da revizor na bazi finansijskog izvještaja pokuša da ustanovi da li je Bosansko Podrinjska narodna stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka i da li su troškovi predizborne kampanje u okviru zakonom dozvoljenih .

Obim kancelarijske revizije finansijskih izvještaja Bosansko Podrinjske narodne stranke obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta, priloge fizičkih i pravnih lica i troškove predizborne kampanje.

4. PRETHODNE REVIZIJE

Izvršen je pregled godišnjeg finansijskog izvještaja Bosansko Podrinjske narodne stranke za 2005. godinu i izdat izvještaj o pregledu sa mišljenjem revizora, nalazima i preporukom revizije da stranka treba postupati u skladu sa odredbama člana 4. i člana 6. Zakona o finansiranju političkih stranaka. Izvještaj je stranci dostavljen, nakon što je politička stranka Centralnoj izbornoj komisiji BiH podnijela godišnji finansijski izvještaj za 2006. godinu.

5. NALAZI KANCELARIJSKE REVIZIJE I PREPORUKE

5.1. NALAZI

- a) Na osnovu obavljene kancelarijske revizije godišnjeg finansijskog izvještaja utvrđeno je da je BPNS prekršila odredbe člana 4. stav 2. i člana 6. Zakona o finansiranju političkih stranaka.¹**

Stranka u godišnjem finansijskom izvještaju nije iskazala troškove zakupnine poslovnog prostora za 2006. godinu. Koristila je tuđi prostor bez naknade, a da pri tome nije prijavila prilog političkoj stranci.

¹ Prema odredbama člana 4. stav 2. Zakona o finansiranju političkih stranaka („Službeni glasnik BiH“ broj 22/00), pravno ili fizičko lice koje političkoj stranci pruža uslugu mora stranci ispostaviti račun, bez obzira na to ko snosi plaćanje usluge, odnosno, bez obzira da li je usluga pružena bez naknade. U skladu sa članom 6. istog zakona, ako ukupni iznos priloga jednog lica premašuje 100,00 KM, prilog se mora unijeti u finansijski izvještaj stranke.

b) Stranka nije ispoštovala odredbe člana 11. stav 3. Zakona o finansiranju političkih stranaka jer finansijski izvještaj nije popunila u skladu sa Pravilnikom o godišnjim finansijskim izvještajima političkih stranaka.²

- U finansijskom izvještaju stranka je u organizacionoj strukturi navela samo Glavni odbor BPNS, koji ima otvoren transakcijski račun a propustila da navede 4 opštinska odbora koji egzistiraju u okviru stranke.³
- U obrascima finansijskog izvještaja na kojima su iskazani prilozi od fizičkih i pravnih lica nisu navedeni jedinstveni matični brojevi fizičkih lica niti identifikacioni brojevi pravnih lica u skladu sa članom 14. i članom 15. Pravilnika o godišnjim finansijskim izvještajima političkih stranaka.
- U finansijskom izvještaju stranka nije iskazala obaveze po osnovu kratkoročnih kredita u iznosu 8.540,70 KM u okviru kojih su krediti od pravnih lica u iznosu od 5.125,00 KM i krediti od fizičkih lica u iznosu 3.415,70 KM. Takođe u poslovnim knjigama stranka je iskazala obaveze po kratkoročnim razgraničenjima u iznosu 7.664,00 KM koje nisu iskazane u finansijskom izvještaju.
- Stranka Centralnu izbornu komisiju BiH nije obavijestila o promjeni adrese niti o promjeni osobe ovlaštene za zastupanje stranke.

5.2. PREPORUKE :

Bosansko Podrinjskoj narodnoj stranci se preporučuje da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- ***Da treba postupati u skladu sa odredbama člana 4. i člana 6. Zakona o finansiranju političkih stranaka***
- ***Da finansijske izvještaje treba popunjavati u skladu sa odredbama člana 11. stav 3. Zakona o finansiranju političkih stranaka i Pravilnikom o godišnjim finansijskim izvještajima političkih stranaka.***

Troškovi predizborne kampanje

Bosansko Podrinjska narodna stranka je postupila u skladu sa odredbama člana 15.10 Izbornog zakona BiH, odnosno u svrhu izborne kampanje su potrošila 264,00 KM.

² U skladu sa odredbama člana 11. stav 3. Zakona o finansiranju političkih stranaka, a prema kome stranka podnosi finansijski izvještaj u formi koju odobri Centralna izborna komisija, donesen je Pravilnik o godišnjim finansijskim izvještajima političkih stranaka kojim su propisani sadržaj i forma finansijskog izvještaja („Službeni glasnik BiH“ broj 61/06)

³ U obrascu 1-1 koji je BPNS u sklopu godišnjeg finansijskog izvještaja za 2006. godinu dostavila Centralnoj izbornoj komisiji BiH evidentiran je samo glavni odbor stranke. Osim glavnog odbora u sastavu BPNS funkcionišu: OO Tuzla, OO Zenica, OO Goražde i OO Han Pijesak.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM⁴ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije Bosansko Podrinjska stranka je mogla potrošiti 727.258,00 KM.

Komentar

Bosansko podrinjska narodna stranka se nije očitovala na nalaze revizije i mišljenje revizora dato u preliminarnom izvještaju o pregledu godišnjeg finansijskog izvještaja za 2006. godinu koji joj je dostavljen 22.02.2008. godine.

Hasida Gušić, šef Službe za reviziju - revizor

⁴ Član 15.10 stav 2. istog člana propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.